

matris Gallici, quod *Moses servatus* inscribitur, in qua copiosè demonstravit Tanim fuisse sedem antiquissimorum Ægypti regum. Sed Samsonis ætate nondum erat edita. Subjuncta est Chanaani *Bocharti*, in Editione Lugdunensi. De Daphnis nos diximus in *Questione Hieronymiana* V. Hunc errorem etiam erravit bonus *Lubinus*, quamvis ab *Hieronymo*, & LXX Interpretibus ea oppida non eodem nomine appellantur; nam *תנין* vocant *Tanin*, & *תפניס* verò *Taphnes*. Cum viderent Geographi Regii, eos quos auctores sequebantur non eodem modo hæc nomina scribere, debuissent quod verum erat olfacere. Video tamen & alios sic errasse, nam qui addidit notas margini Editionis Hondianæ Ptolemæi, seu is fuerit *Petrus Montanus*, seu alius, simile delictum admisit ad oram Cap. v. Libri IV. Geographiæ Ptolemæi. Ad Hebraicæ Linguæ, Geographiæque Sacræ imperitiam accessit, quod *Ptolemæus* Daphnarum Ægyptiarum non meminerit. Quamobrem etiam eam urbem omissam videmus in Tabulis Ægypti, etiam in ea quæ à *Pet. Duval* est edita. Debit collocari non procul à Pelusio, nam *Herodotus* vocat *Daphnas Pelusias* Lib. II. c. 30. docetque præsidium fuisse Ægypti, contra Arabas & Syros. Ex Antonini Itinerario octo millibus passuum Pelusio distabat.

TERRA HUS. *Basanitis pars putatur*, inquit *Samson*. Vide *Hus*, ubi hæc tantum dicta oportuit. Multò rectius sedes Jobi collocantur, in Arabia deserta ad Euphratem, ubi *Ausitis* à *Ptolemæo* describitur. Vide ad Gen. XXII. 21.

THAMAR. Rectè *Samson* probat ex situ non esse Palmyram. Potuisset addere, ideo non sequi esse, quia *Thamar* palmam significat; nam nomen Hebraicum Palmyræ est תמר *Thadmor*, non *Thamar*, & præterea *Palmyra* nomen est Græcum, non Latinum, quamquam fortè origine orientale. Vide Cap. I. Appendicis Antiquitatum Palmyrenarum *Ab. Selleri*, antea laudatarum.

THARSIS. De hoc nomine consulendi *Sam. Bochartus* Phalegi Lib. III. c. 7. & *Dan. Huëtius* in Commentario, de navigationibus Salomonis, Cap. III. Prior credidit *Tharsis*, quam Salomo navibus petiit, fuisse in India; posterior putat eo nomine significari omnem oram occidentalem Africæ & Hispaniæ. Digni sunt quorum argumenta omnia, à rerum ejusmodi curiosis, expendantur.

THIRAS. Noster terrarum orbem divisit, pro arbitrio, Noachi nepotibus, nec ullam rationem nominum, aut Historiæ habuit. At multò rectius *Sam. Bochartus* hunc *Tiras* תירס in Thracia vicinisque locis collocavit, Phalegi Lib. III. c. 2.

TIBERIAS. De hac urbe multa habet *Joan. Lightfootius* Cent. Chorog. Matthæo præmissæ Cap. LXXII. quod vide.

TORRENS. Mirum est cum tot torrentes essent in Judæa, neque ullus ita καταρροχην vocaretur, hanc appellativam vocem, quasi nomen proprium, hic recenferi. Mirum etiam est quid sibi velit *Samson*, hisce verbis: *ipse est ex quo David limpidissimos quinque lapides elegit*. Scimus quidem ex quodam torrente tribus Judæ electos hosce læves lapides, ex I Regum C. XVII. 40. sed nomen torrentis non additur, nec tamen vocatur תנחל *ban-nabhal*, torrens, quasi esset torrentibus aliis insignior, sed tantum quia sermo est de vicino quodam torrente. Sic accolæ fluvii cujuscvis, in Gallia, non tantum nomine proprio, sed & appellativo vocitant, *la riviere*, hoc est, fluvium, quia subaudiunt vicinum. Nemo tamen propterea Dictionarium conficiens, ex illorum sermone, nomen proprium faciet **LA RIVIERE**.

TROAS. Troadem quidem dictum olim fuisse tractum Trojæ vicinum nemo nescit; at in Actis Apostolorum de eo tractu sermo non est, sed de urbe, quæ vocabatur *Alexandria Troas*, ut ab aliis Alexandriis distingueretur, & simpliciter *Troas*. Possit esse dubius locus Act. XVI. 8. ubi dicitur Paulus καταβῆναι εἰς Τρωάδα, nam ambigua est loquutio, postea de tractu toto Troici agri intelligi. Sed Cap. XX. 6. ubi dicitur Paulus expectatus fuisse ἐν Τρωάδι à comitibus, mansisse per septem dies & concionatus esse, satis liquet urbem esse intelligendam, cum Latino Interprete, qui loquutione minimè ambigua significavit se intelligere urbem, non regionem. Habet enim, sine præfixa præpositione, ut solet fieri in nominibus urbium, non tractuum: *descenderunt Troadem, sustinuerunt nos Troade, venimus ad eos Troadem*. Quod si animadvertissent, ut par erat, Geographi Regii *Samson* & *Lubinus*, qui à Vulgata toti pendent, non dixissent Troadem hic nomen esse regionis. Si inspexissent etiam *Jac. Bonfrerii* Onomasticon Urbium & locorum Sacræ Scripturæ, errorem suum facile intelligere potuissent; qui tamen cum sit ab aliis doctioribus admissus, immineatque finis pensæ hujusce nostri, paullo pluribus hic à nobis demonstrabitur. Primum urbem fuisse Troadem ostendemus; deinde errantium aliquot veterum & recentiorum verba recitabimus; quod posthac ab eo delicto magis caveatur. *Polybius* Lib. V. sub finem: Εγένετο μὲν τις ἐκ ἀγένης περὶ ταῦτα πράξις καὶ ὑπὸ τῶν περὶ τὴν Τρωάδα κατοικούντων Ἀλεξανδρεῶν Θεμιστὴν γὰρ ἐξαποστείλασθαι μετ' ἀνδρῶν τετρακισχίλιον ἔλυσαν μὲν τῶν Ἰλίων πολιούχων, ἐξέβαλον δ' ἐκ πάσης τῆς Τρωάδος τὰς Γαλάτας: *Egregium sanè facinus ab Alexandrensibus, qui Troadem colunt, est editum. Misso enim Themiste, cum quatuor militum millibus, non solum Ilienses obsidione liberarunt; sed etiam ex universa Troade Gallos ejecerunt*. Hi Alexandrenses sunt Troadenfes, quorum & antea mentionem injecit. Pluribus ejus urbis meminit *Strabo*, initio Lib. XIII. hisce verbis: Ἀπὸ δὲ Ἀβύδος μέχρι Λεκτῆς τὰ περὶ Ἰλίον, καὶ Τενέδον, καὶ Ἀλεξανδρεῖαν τὴν Τρωάδα: *Ab Abydo Lectum usque est Ilium, Tenedos, & Alexandria Troas*. Non, *Alexandria*, ac *Troas* denique, ut malè habet Interpres Latinus, quasi Ale-